

Den caso di hende cu problema mental cu a menaza su tata

Hues ta muestra cu ta Reino Hulandes mester percursa pa tin un institucion adecua pa trata hende cu problema mental

ORANJESTAD—Recientemente Corte den Promer Instancia a condena Pedro Kock, pa a menaza su tata cu morto. Hues a bisa cu e ta haya legal proba cu Pedro a menaza su tata cu morto y cu entre tanto e tata a fayece. Hues a tene cuenta cu Pedro su carchi castigo ta limpi. Sinembargo Hues a muestra cu na 1998, Pedro a wordo declara liber di intento di mata y cu e mester a wordo interna den un institucion door cu e no ta responsabel pa su actonan.

Den e caso actual, psiquiater a

determina cu Pedro pa gran parti ta responsabel pa su actonan y cu Pedro ta adicto y cu ora e usa droga e ta bira peligroso. Si e no usa droga e no ta peligroso. Psiquiater a muestra cu Pedro ta conciente cu si e no usa droga e no ta bira problematico.

Psiquiater ta haya cu Pedro mester wordo interna den un institucion cera. Na Paaz no tin e lugar aki y pa hopi tempo a pidi Gobierno pa esaki pero ainda nada. KIA no ta e lugar adecuado pa esaki.

Hues a muestra cu teniendo cuenta cu tur cos, ley penal no tey pa laga sera hende pa algo cu no ta den man di Corte sino den man di Gobierno. Ta Gobierno hunto cu Antiyas y Hulanda mester busca un forma. Hues a muestra riba un sentencia di Derechonan Humano cu a cuestiona e hecho cu a sera un persona cu problema mental den KIA. Den dicho sentencia no a culpa Gobierno sino Reino Hulandes cu mester cumpli cu e tratado. Den e caso di Pedro, desde December 2008 e

ta sera. Hues ta haya e demanda di 18 luna di prison di Fiscal mucho halto y a condena Pedro na 12 luna di prison di cual 6 luna ta condicional cu tempo prueba di 2 aña. Hues a sigui bisa cu como condicion special, Pedro mester sigui tratamento di psiquiater y mester sigui usa medicamentonan y stop di usa droga.

El a muestra Pedro cu si e no cumpli cu esaki, e lo bay sinta e 6 lunanan cu ta condicional. Segun Pedro ora e sali e lo bay Centro Dakota.